

A touz ceauz qui ces présentes lettres verront et oiront Li eschevin de Maisières saluz Nos faisons asavoir à tous que Huez Bauche borjoiz de Maisières et Yvette sa femme establit pour ce en nostre présence ont recognut par devant nos qu'il ont vendu ou donner en eschange auz religieux homez à labbeit et au covent de sefontainez del ordre de preit mostret la moietiet d'une pièce de terre qui siet ou terroir de escoignez en un leu con dist mahieval par deverz nueville
5 la moietiet de une aut[re] pièce de terre que reniers traist de bos a champ le quele pièce de terre siet au terroir de escoignes en un leu con dist la faisse devigny et une autre pièce de terre qui siet deleiz¹ cent fontainez la quele pièce ces Huez Bauche et sa femme acquirent à Huet Devigni Le clers en tel manière toutevoie que le diz Huez Bauche et Yvette sa femme perront et averont chascune semaine tant qil viveront une provende de pain de covent pour ces devant dites pièces de terre en la dite maison de set fontainez c'est asavoir XXVIII painz de covent chascune semaine les
10 que XXVIII paing le dit abbé et le covenz seront tenuz à baillier et à délivrer ou à faire baillier et délivrer aus devant diz Huon Bauché et Yvette sa femme ou à leur commandement especial de semaine en semaine parsuitement senz débat Et est ancor asavoir qui se le ung des deug devant diz Huon et yvette moiroit le autres qui demeuroit en vie tene- roit perroit et leveroit toute la devant dite provende entièrement cest asavoir les XXVIII painz de covant devant diz
15 chascune semaine de rente tant qil viveroit et le dit abbez et le covenz le seroient tenu à paier la dite provende cha- cune semaine entièrement et parsuitement cest asavoir à luy ou à son commandement Et toutes ces chosez devant dites le devant dit Huez Bauche et Yvette sa femme ont recognut loeit et greeit par devant nos et ont promis par leur foit cet paroile donnée par devant nos que jamaiz a nul jouir encontre ce devant dit vendaige ou eschange il ne iront ne aprez il ne rapeleront ne par eauz ne par autre et que il en porteront bonne warentise loial à labbeit et au covent devant diz auz us et aus coustumez dou pais envers touz ceaux qui a jouir et a droit en voiroient venir En tesmoignai

¹ A côté de

20 ge des quelez chosez nos eschevin de Maisières avonz scelééz ces présentes lettres de nostre scel Ce fut fait en
lan del incarnation nostre signeur mil deuz cenz et cinquante et un XII^e du moiz de septembre